



Broj: 03/1-50-14-7-8- 3/15
Sarajevo, 25.8.2015.

PREDMET: Izvještaj s održane radionice o temi: „Zakonodavni okvir, aktuelno stanje i planovi institucija BiH u oblasti odbrane i sigurnosti“, s prijedlogom zaključaka

U skladu s Orijentacionim planom rada za 2015. godinu, u organizaciji Zajedničke komisije za odbranu i sigurnost BiH (u daljnjem tekstu: ZK), na Jahorini je 2. i 3. juna 2015. godine održana radionica o temi: „**Zakonodavni okvir, aktuelno stanje i planovi institucija BiH u oblasti odbrane i sigurnosti**“. Podršku u organizaciji radionice dali su ženevski DCAF, Misija OSCE-a u BiH i Štab NATO-a u Sarajevu.

U ime ZK i Parlamentarne skupštine BiH (u daljnjem tekstu: PSBiH), u radu radionice učestvovali su: Sifet Podžić - predsjedavajući ZK, Borislav Bojić i Borjana Krišto - zamjenici predsjedavajućeg, Dušanka Majkić, Šemsudin Mehmedović, Hazim Rančić, Bariša Čolak, Mario Karamatić, Hanka Vajzović - članovi ZK, Boško Šiljegović - parlamentarni vojni povjerenik, Ljiljana Milićević - sekretarka, Željko Grubešić - stručni savjetnik, i Zoran Žuža - šef Odjela za informiranje u Sektoru za odnose s javnošću PSBiH.

U radu radionice učestvovali su predstavnici:

1. SEKTORA ODBRANE :

- Ministarstvo odbrane BiH:

- Marina Pendeš, ministrica odbrane BiH
- Emir Suljagić i Boris Jerinić, zamjenici ministra odbrane BiH
- Muhamed Smajić, sekretar Ministarstva odbrane BiH
- Marinko Šiljegović, pomoćnik ministra odbrane BiH
- brigadni general Enes Husejnović, generalni inspektor

- Zajednički štab Oružanih snaga BiH:

- generalpukovnik Anto Jeleč, načelnik
- generalmajor Senad Mašović, zamjenik načelnika

- generalmajor Mirko Tepšić, zamjenik načelnika
- **Operativna komanda Oružanih snaga BiH:**
 - generalmajor Dragan Vuković, komandant
- **Komanda podrške OSBiH:**
 - generalmajor Husein Tursunović
- 2. SEKTORA SIGURNOSTI:**
- **Ministarstvo sigurnosti BiH:**
 - Dragan Mektić, ministar
 - Mijo Krešić, zamjenik ministra
 - Mate Miletić, pomoćnik ministra
- **Direkcija za koordinaciju policijskih tijela BiH:**
 - Uroš Pena, zamjenik direktora
- **Državna agencija za istrage i zaštitu – SIPA:**
 - Jasmin Gogić, pomoćnik direktora
- **Granična policija BiH:**
 - Zijad Srabović, zamjenik direktora
 - Nedžad Muratspahić, inspektor za strateško planiranje i evropske integracije
- **Služba za poslove sa strancima:**
 - Izet Nizam, zamjenik direktora
 - Mišo Ćavar, pomoćnik direktora
 - Rade Kovač, pomoćnik direktora
- **Agencija za policijsku podršku:**
 - Jasmin Pilica, direktor
- **Agencija za forenzička ispitivanja i vještačenja:**
 - Ljiljana Trišić, direktor
- **Agencija za školovanje i stručno usavršavanje:**
 - Boris Ivanović, zamjenik direktora
- 3. DRUGIH INSTITUCIJA nad kojima ZK u dijelu svojih nadležnosti vrši parlamentarni nadzor, i to:**
- **Ministarstvo vanjske trgovine i ekonomskih odnosa BiH:**

- Dragiša Mektić, pomoćnik ministra
 - **Državna regulatorna agencija za radijacijsku i nuklearnu sigurnost:**
 - Emir Dizdarević, direktor
 - **Komisija za deminiranje Vijeća ministara BiH:**
 - Franjo Markota, član Komisije
 - **Centar za uklanjanje mina u BiH - BHMACH:**
 - Milan Rezo, zamjenik direktora
- 4. ENTITETSKIH ZAKONODAVNIH I IZVRŠNIH TIJELA:**
- **Komisija za sigurnost Predstavničkog doma Parlamenta Federacije BiH:**
 - Midhat Karović, predsjedavajući
 - **Komisija za bezbjednost Narodne skupštine Republike Srpske:**
 - Milanko Mihajlica, predsjedavajući
- 5. MEĐUNARODNIH ORGANIZACIJA U BiH:**
- **Misija OSCE-a u BiH:**
 - Jonathan Moore, šef Misije OSCE-a u BiH
 - John Martin, direktor Odjela za sigurnosnu saradnju
 - Sanja Čatibović, Vera Orloff, Sanja Fitzgerald, Samir Bašić i Uguloy Mukhtorova
 - **Štab NATO-a u Sarajevu:**
 - brigadni general Wiliam Petty, komandant Štaba NATO-a
 - brigadni general Giselle Wilz, novi K-t komandant Štaba NATO-a
 - brigadir Ole Asbjorn Fauske, zamjenik komandanta
 - Matthew Perkins, Theresia Hersch, Kenneth Lindsay, Dario Šikuljak, Aleksandra Stanić, Rohan Maxwell, šef političko-vojne savjetodavne sekcije
 - Lejla Hadžihasanović, oficir za parlamente
 - **Komanda EUFOR-a:**
 - brigadni general Zoltan Mihóczy, načelnik Štaba
 - brigadir Siegfried Dohr
 - pukovnik Zsolt Magasy
 - **EUSR:**
 - Richard Wood, Andrej Grošelj i Vesna Willis, Odjel za unutrašnju politiku i javnu sigurnost

UNDPBiH:

- Lillian Palmbach i Jasmin Porobić, program menadžer

RACVIAC Zagreb:

- Branko Kromar, program menadžer

DCAF:

- Darko Stančić, šef operacija za JI Evropu, i Teodora Fuior, menadžer programa

6. NEVLADINOG SEKTORA:

- **Centar za sigurnosne studije:**
 - Denis Hadžović, generalni sekretar

Borjana Krišto, zamjenica predsjedavajućeg ZK otvorila je radionicu. Prezentirala je ciljeve radionice i pozvala učesnike da u svojim izlaganjima i prezentacijama budu konkretni s prijedlozima kako rješavati aktuelne probleme u sektoru odbrane i sigurnosti.

Nakon uvodnog izlaganja Sifeta Podžića, predsjedavajućeg ZK, koji je naglasio ciljeve održavanja radionice, učesnicima su se obratili Jonathan Moore, šef Misije OSCE-a u BiH, brigadni general Wiliam Petty, komandant Štaba NATO-a u BiH, brigadni general Zoltan Mihocza, načelnik Štaba Komande EUFOR-a, Darko Stančić, zamjenik direktora DCAF-a za JI Evropu.

Prvim panelom radionice predsjedavala je Borjana Krišto, zamjenica predsjedavajućeg.

Željko Grubešić, stručni savjetnik u Uredu sekretara ZK, prezentirao je rad i aktivnosti te pozitivne prakse u radu ZK u proteklom periodu, a Boško Šiljegović, parlamentarni vojni povjerenik BiH, rad Ureda parlamentarnog vojnog povjerenika u zaštiti ljudskih prava pripadnika Oružanih snaga BiH.

Rad radionice odvijao se prema utvrđenom programu, a izlaganja svih učesnika sadržana su u priloženim prezentacijama predstavnika institucija koje čine sastavni dio ovog izvještaja. (Svi prisutni članovi ZK - učesnici radionice dobili su sve prezentacije u printanoj formi tokom zasjedanja na Jahorini.)

I. ANALIZA STANJA PO INSTITUCIJAMA

- **MINISTARSTVO ODBRANE I ZAJEDNIČKI ŠTAB ORUŽANIH SNAGA BiH**

Sifet Podžić, predsjedavajući ZK, predsjedavao je drugim panelom. U uvodu je istakao da tokom ovog panela članovi ZK očekuju detaljne informacije o stanju u sektoru odbrane. Aktuelni materijal, koji daje osnovu za razgovor, jeste Izvještaj o radu Ministarstva odbrane BiH za 2014. godinu. Ministarstvo odbrane BiH dostavilo ga je 5.5.2015. Zajedničkoj komisiji za odbranu i sigurnost BiH. Napomenuo je da je ZK sažetak ovog izvještaja, razmatrala na 2. sjednici, održanoj 22.4.2015., kada je razmatrala Izvještaj o radu Vijeća ministara BiH za 2014. godinu, koji je podnio predsjedavajući Vijeća ministara BiH.

Ono što je bitno naglasiti za uvod u drugi panel je da je MOBiH za 2014. godinu postavilo 113 programskih ciljeva, od kojih je 80 realizirano u potpunosti, 27 djelimično i šest nije realizirano. Posebno je istaknuto poglavlje o pomoći OSBiH civilnom stanovništvu tokom majskih poplava u 2014. godini, proces deminiranja, tekuće aktivnosti svojstvene strukturi OSBiH.

Podžić je naglasio da treba istaći angažman tokom poplava i pomoći civilnom stanovništvu. Isto tako, vidljivo je da nema dovoljno adekvatne opreme, o čemu u narednom periodu treba voditi posebno računa. Treba uložiti dodatne napore na opremanju jedinica koje su predviđene za angažiranje u vanrednim situacijama. To je proces i u tome treba istrajati.

Deminiranje je uspješno realizirana aktivnost, kao i slanje pripadnika OSBiH u mirovne misije. Saradnja s NATO-om odvija se uspješno u okviru IPAP-a i u ovim okolnostima najbitnije je razvijati standarde NATO-a u ispunjavanju programskih ciljeva.

Ispunjavanje preuzetih međunarodnih obaveza odvija se planski i uspješno.

Kada je u pitanju stanje personala, vidljivo je plansko popunjavanje i znavljanje OSBiH mladim vojnicima i kategorijama koje omogućavaju izvršavanje zadataka određenih misijom.

Nabavka i logistika su detaljno obrađeni. Vidljivo je da proces ugovaranja i održavanja sredstava ne ide željenim tokom. Operativnost MTS je na niskom i zabrinjavajućem nivou i menadžment se mora opredijeliti i predložiti kako dalje.

Stanje neperspektivne pokretne i nepokretne imovine je i dalje predmet kalkulacija i obećanja. U Izvještaju se navodi da se očekuje rješenje do sredine 2015. Entitetske vlade u saradnji s MOBiH ovaj problem trebaju riješiti odmah i bez odgađanja. Odgovor treba dobiti što prije i završiti ovu priču zbog koje svakodnevno gubimo resurse i novac.

Proces uništavanja viškova naoružanja i MES-a ide ustaljenom dinamikom. Godišnje se uništi oko 1000 tona, a izvjesno je da se može postići i cilj od 2000 tona.

Članovi ZK trebaju imati više informacija o realizaciji programa „Explode“. Interesira ih šta radi i koliko je efikasan Strateški komitet, u kojoj je fazi realizacija jer se ulažu značajna sredstva. Paradoksalno je da sjednici Strateškog komiteta ne prisustvuje niko iz Zajedničke komisije, a prisutni su predstavnici svih međunarodnih organizacija u BiH koje imaju bilo kakav dodir s tim projektom.

Vidljivo je da OSBiH imaju veoma star i dotrajaao autopark. Bilo je i saobraćajnih nesreća gdje su glavni krivci stara oprema i pneumatici. Ozbiljno treba poraditi na obnovi resursa jer izlažemo ljude svakodnevnim opasnostima i riziku.

Zna se da je struktura budžeta nepovoljna i da oko 90% sredstava ide na troškove personala.

Težišne zadatke za 2015. godinu treba daleko operativnije i konkretnije predstaviti.

Generalpukovnik Anto Jeleč, načelnik ZŠOSBiH, u svom izlaganju prezentirao je zakonodavni okvir po kojem rade Zajednički štab i OSBiH u cjelini. Govorio je o strukturi i zadacima Zajedničkog štaba i OSBiH, trenutnom stanju personala, obuke i vježbi, logistike, međunarodnom predstavljanju i saradnji, protuminskim akcijama, pomoći civilnim vlastima, projektima razvoja i izazovima pred kojima se nalaze Zajednički štab i Oružane snage BiH u cjelini. Posebno je apelirao na podršku u nastojanju ZŠOSBiH da se nabavi 200 motornih vozila jer je sadašnji autopark u OSBiH u lošem stanju.

Marina Pendeš, ministrica odbrane BiH, u svojoj prezentaciji govorila je o zakonodavnom okviru, funkcioniranju organizacione strukture, najznačajnijim realiziranim aktivnostima, primarnim ciljevima u oblasti odbrane te planiranim zadacima tokom 2015. godine. Posebno je naglasila aktuelno stanje i probleme rješavanja viškova naoružanja i municije OSBiH, probleme u nabavci opreme i javnim nabavkama, rješavanje pitanja pokretne vojne imovine i njihove predaje entitetskim vladama.

Rasprava:

Nakon izlaganja generalpukovnika Ante Jeleča i ministrice odbrane Marine Pendeš, u raspravi su učestvovali članovi ZK.

Dušanka Majkić potencirala je pitanja u vezi sa izradom dokumenta „Pregled odbrane“, pregled popune OSBiH. Izrazila je svoje čuđenje da OSBiH imaju više oficira i podoficira od vojnika. Podržala je generala Jeleča u nastojanju da se obnovi oprema, ali je konstatirala da u proteklih pet godina za potrebe sektora odbrane nije potrošeno skoro 50 miliona KM iz odobrenog budžeta. Konstatirala je da su skladišta vojne opreme zatrpana neperspektivnom vojnom imovinom i opremom, te da se osam godina govori o uništavanju municije i MES-a, a da je tom zadatku jedino odgovorio TROM Doboj. Pozvala je novi menadžment MOBiH da se opredijeli da do kraja 2015. godine riješi tri strateška pitanja i problema koji su evidentni dugi niz godina te da izradi akcioni plan koji će obavezati sve subjekte u sektoru odbrane na izvršenje preuzetih obaveza.

Borislav Bojić podržao je inicijativu ministrice Pendeš da se održi radnokonsultativni sastanak članova ZK s menadžmentom MOBiH. Podržao je i ideju o pripremi akcionog plana kojim bi se MOBiH za ovu godinu opredijelilo o strateškom djelovanju u pojedinim oblastima i tako rješavao dio po dio preuzetih obaveza.

Sifet Podžić pozvao je članove ZK da pomognu MOBiH i OSBiH u rješavanju aktuelnih problema. Sugerirao je predstavnicima MOBiH i ZŠOSBiH da pripreme akcioni plan za

rješavanje aktuelnih problema te da prezentiraju potrebe koje bi OSBiH učinile efikasnijim, posebno tokom pružanja pomoći civilnom stanovništvu, kao i procesu deminiranja.

- **MINISTARSTVO SIGURNOSTI BiH i SIGURNOSNE AGENCIJE**

Borislav Bojić, prvi zamjenik predsjedavajućeg, moderirao je trećim panelom na kojem se razgovaralo o stanju u sektoru sigurnosti. Naglasio je da članovi ZK dobro znaju stanje i neke probleme. Tokom prošlog mandata konstatirano je da nemamo dobru koordinaciju u radu policijskih agencija na nivou Bosne i Hercegovine. To se potvrdilo tokom terorističkog napada na Ambasadu SAD-a u BiH, tokom blokada zajedničkih institucija i u još nekoliko navrata kada se, nasreću, nisu osjetile veće posljedice.

Sigurnosna situacija opterećena je brojnim izazovima. Dovoljna je mala iskra pa da sve plane. Članovi ZK bore se da do toga ne dođe te insistiraju da svako radi svoj posao i da se jasno zna ko, kada i u koje vrijeme reagira.

Konstatirano je da imamo dobro organizirane policijske agencije. U njima rade profesionalci i znalci. Osim koordinacije u radu i djelovanju, ostaje pitanje izrade i dogradnje određenih strateških dokumenata. Tu se posebno misli na Sigurnosnu politiku BiH koju je usvojilo Predsjedništvo BiH prije devet godina. Prevaziđena je i potrebno je iskoristi struku i ljude koje imamo da do kraja 2015. godine završimo taj posao. U svakoj zemlji je bespredmetno pričati o toj potrebi, a mi donosimo zaključak na zaključak i uvijek neko nekoga čeka.

Bojić je naglasio da je vrijeme da preispitamo rad brojnih koordinacionih tijela i da se uozbiljimo jer trošimo novac uzalud, a i dragocjeno vrijeme. Krajnje je vrijeme da se zna pravo stanje i spremnost da odgovorimo savremenim sigurnosnim izazovima. Govori se o terorizmu, o stranim plaćenicima, o našim građanima koji odlaze na strana ratišta. Govori se o ekstremistima. Veliki je broj zaposlenih u agencijama čiji je posao da znaju sve ili gotovo sve o spomenutim problemima.

Bojić je naglasio da ZK svake godine organizira i sigurnosnu konferenciju. Članovi ZK usvoje zaključke i dalje ne ide. Ovog puta članovi ZK žele da se ono što se dogovori na radionici predloži domovima PSBiH da to potvrde. Time će svi imati obaveze i odgovornost za njihovo ispunjenje. Teroristički akt u Zvorniku obavezuje sve da kažemo šta možemo uraditi i kako i na koji način se trebamo suprotstaviti izazovima koje možemo grupirati u niz kome, nažalost, ovog momenta teško možemo vidjeti kraj.

Dragan Mektić, ministar sigurnosti BiH, u svojoj prezentaciji istakao je zakonodavni okvir, nadležnosti i strukturu, misiju i viziju Ministarstva sigurnosti BiH. Isto tako, naglasio je glavne karakteristike aktuelnog sigurnosnog stanja u BiH s uporednim trendovima. Ministar Mektić je članovima ZK posebno obrazložio aktuelne sigurnosne izazove i mogućnosti policijskih agencija iz sastava Ministarstva sigurnosti da im se suprotstave.

2.1. DIREKCIJA ZA KOORDINACIJU POLICIJSKIH TIJELA BiH

Uroš Pena, zamjenik direktora Direkcije, obrazložio je nadležnosti Direkcije. Posebno se osvrnuo na primjenu najboljih evropskih i međunarodnih praksi na policijska pitanja u BiH, provođenje međunarodnih ugovora o policijskoj saradnji iz njihove nadležnosti, problemima fizičke i tehničke zaštite VIP ličnosti i objekata, te potrebi standardizacije rada u vezi s policijskim pitanjima u BiH. Pena je posebno naglasio saradnju Direkcije s relevantnim policijskim i drugim tijelima i preduzimanju potrebnih mjera s ciljem koordiniranja operativnih poslova policijskih tijela BiH. Osvrnuo se na strateške ciljeve, aktivnosti Sektora za međunarodnu operativnu policijsku saradnju te potcrtao probleme i izazove s kojima se suočava Direkcija.

2.2. GRANIČNA POLICIJA BiH

Nedžad Muratspahić, inspektor za strateško planiranje i evropske integracije, prezentirao je institucionalni i zakonodavni okvir, aktuelno stanje i planove Granične policije BiH u oblasti sigurnosti granice. Posebno se osvrnuo na probleme prekograničnog kriminaliteta, međuagencijsku i međunarodnu saradnju te saradnju sa susjednim zemljama. Planovi Granične policije BiH u oblasti sigurnosti granice, realizacija Strategije Granične policije BiH i drugih saglasnih strategija, u funkciji realizacije obaveza BiH u procesu pridruživanja EU, provođenje aktivnosti na usvajanju i primjeni zakonodavstva relevantnog za rad Granične policije BiH, sa aspekta potpunog usaglašavanja sa standardima EU, težišta su u radu u narednom periodu, što je posebno istaknuto u prezentaciji.

2.3. DRŽAVNA AGENCIJA ZA ISTRAGE I ZAŠTITU - SIPA

Jasmin Gogić, pomoćnik direktora, načelnik Odjeljenja za unutrašnju kontrolu, u svojoj prezentaciji govorio je o formiranju i razvoju SIPA-e, nadležnostima, organizacionoj strukturi, kadrovskoj popunjenosti, teritorijalnoj nadležnosti regionalnih ureda, uočenim trendovima po pojedinim oblicima kriminaliteta i rezultatima SIPA-e na njihovom sprečavanju, otkrivanju kriminaliteta i istragama, saradnji s policijskim agencijama i drugim nadležnim tijelima u BiH. Isto tako, naglasio je značajne rezultate međunarodne saradnje, mjere za unapređenje aktuelnog stanja sigurnosti u BiH, o intenziviranim aktivnostima pojedinih pripadnika radikalnih religioznih grupa u BiH i okruženju, o mjerama koje se preduzimaju u prevenciji i borbi protiv terorizma, finansijskom kriminalu i korupciji, neovlaštenom prometu opojnim drogama, trgovini ljudima, pranju novca, problemima u povredi autorskih prava, ratnim zločinima i krivičnim djelima kažnjivim po međunarodnom humanitarnom pravu, saradnji s policijskim agencijama i drugim nadležnim tijelima u BiH.

2.4. SLUŽBA ZA POSLOVE SA STRANCIMA

Izet Nizam, zamjenik direktora, prezentirao je aktuelno stanje u Službi za poslove sa strancima. Istakao je najbitnije aktivnosti u oblasti migracija, aktivnosti na sprečavanju i otklanjanju nelegalnih migracija, doprinos Službe izgradnji uređenog sektora sigurnosti BiH, govorio je o problemima u prihvatu, smještaju i udaljenju migranata, aktivnostima na ispunjavanju međunarodnih obaveza. Gospodin Nizam govorio je i o unutrašnjoj organizaciji, strukturi, budžetu i kadrovskoj popunjenosti Službe te naporima koji se čine da Služba odgovori aktuelnim sigurnosnim izazovima.

2.5. AGENCIJA ZA POLICIJSKU PODRŠKU

Jasmin Pilica, direktor, istakao je aktivnosti Agencije u saradnji s policijskim tijelima BiH, normativnu djelatnost, projekte Agencije, aktivnosti Agencije u saradnji s Delegacijom EU, eventualne mogućnosti širenja nadležnosti. Direktor Pilica naglasio je da centralna evidencija zaposlenih funkcioniše u potpunosti, da se konstantno razvijaju novi informacijski sistemi za policijska tijela, da je u toku pripremanje međunarodnih projekata za policiju te da su tokom 2014. provedene značajne zajedničke javne nabavke.

2.6. AGENCIJA ZA FORENZIČKA ISPITIVANJA I VJEŠTAČENJA

Ljiljana Trišić, direktorica Agencije, informirala je članove ZK o aktivnostima u pripremi Agencije za prijavu za akreditaciju prema međunarodnom standardu BAS ISO/IEC 17025, o učestvovanju u izradi IPA projekta, s ciljem opremanja laboratorija o provođenju stručnih obuka u svim forenzičkim oblastima koje su trenutno zastupljene u Agenciji. Posebno je istakla nezavidan položaj agencija koje su nastale kao rezultat druge faze policijske reforme, o nedovoljnoj podršci nadležnog ministarstva Agenciji i stalnoj neizvjesnosti – ‘ukidanja’, ‘pripajanja’, ‘ekspertske analize’, ‘ekspertske radne grupe’, o nedovoljnoj podršci Ministarstva sigurnosti BiH, posebno kad su u pitanju planiranja IPA projekata, uspostavljanja laboratorije za analizu DNK.

2.7. AGENCIJA ZA ŠKOLOVANJE I STRUČNO USAVRŠAVANJE

Boris Ivanović, zamjenik direktora Agencije, osim aktuelnog stanja i problema u radu, prezentirao je prioritete u radu gdje se posebno osvrnuo na realizaciju osnovne policijske obuke, tokove specijalističke obuke i stručnog usavršavanja, izgradnji kompleksa za trajni smještaj Agencije, saradnji s domaćim institucijama, te razvojnim problemima i ograničenjima. Razvojni problemi i ograničenja Agencije su u nedostatku kompetentnih trenera - eksperata u pojedinim oblastima policijskog rada, nedostatku sredstava za angažiranje kvalitetnih trenera iz zemlje i inozemstva, nedostatku sredstava za savremena učila i opremu, izdavačku djelatnost i selekciju kadeta.

3. MINISTARSTVO VANJSKE TRGOVINE I EKONOMSKIH ODNOSA BiH

Dragiša Mektić, pomoćnik ministra, prezentirao je zakonodavni okvir u oblasti vanjskotrgovinske kontrole robe i usluga od strateške važnosti za sigurnost BiH. Posebno je istakao nadležnosti Ministarstva, obim poslova, provedbene propise, značaj dokumenata koje izdaje Ministarstvo, a odnose se na vanjskotrovinški promet te proces razmatranja zahtjeva za izdavanje dokumenata. Osvrćući se na administrativne mjere, posebno je govorio o procesu koji uslovljava odbijanje zahtjeva za izdavanje dozvole kao i oduzimanje isprave za izvoz i uvoz naoružanja.

4. PROCES DEMINIRANJA

O procesu deminiranja i protivminskog djelovanja u BiH članove ZK upoznali su **Franjo Markota**, član Komisije za deminiranje Vijeća ministara BiH, i **Milan Rezo**, v.d. direktora BHMACH-a.

Franjo Markota prezentirao je aktivnosti Komisije za deminiranje Vijeća ministara BiH i mjere koje preduzimaju na osiguranju finansijskih sredstava za proces deminiranja, s naglaskom da se donatori vraćaju i da je potrebno daleko cjelishodnije angažiranje institucija BiH u cjelokupnom procesu.

Milan Rezo, v.d. direktora BHMACH-a, upoznao je članove ZK s procesima održavanja centralne baze podataka, upozoravanje na mine i pomoć žrtvama mina, sa usklađivanjem aktivnosti sa Strategijom i Planom protivminskih akcija te neophodnosti definiranja tehničkih i sigurnosnih standarda koji su vrlo bitni u cjelokupnom procesu protivminskih akcija. Milan Rezo osvrnuo se i na rezultate protivminskih akcija u 2014. i planove u 2015. godini, kao i reviziju strategije protivminskih akcija za period 2009.-2019. godina.

Nakon izlaganja ministra sigurnosti BiH i direktora policijskih agencija, članovi ZK: Mario Karamatić, Hanka Vajzović, Šemsudin Mehmedović, Hazim Rančić, Borjana Krišto, Borislav Bojić i Sifet Podžić postavljali su pitanja i komentirali prezentacije koje su bile predmet trećeg i četvrtog panela.

5. DRŽAVNA REGULATORNA AGENCIJA ZA RADIJACIJSKU I NUKLEARNU SIGURNOST

Emir Dizdarević, direktor, prezentirao je regulativu u BiH iz oblasti radijacijske i nuklearne sigurnosti, s posebnim osvrtom na status, funkcije i nadležnosti Agencije, provođenje međunarodnih ugovora i sporazuma, kao i proces nadzora i izvještavanja.

Aktivnosti međunarodnih organizacija i mogućnosti partnerske saradnje sa ZK prezentirali su: John Martin, Misija OSCE-a u BiH, Rohan Maxwell, Štab NATO-a u Sarajevu, Teodora Fuior, ženevski DCAF, Branko Kromar, RACVIAC Zagreb, i Jasmin Porobić, UNDP - Ured u Sarajevu.

II. ZAKLJUČCI

S ciljem otklanjanja slabosti u radu ministarstava, institucija i agencija iz sektora odbrane i sigurnosti, Zajednička komisija je na 8. sjednici, održanoj 25. 8. 2015., usvojila sljedeće

ZAKLJUČKE

- 1. Obavezuje se Ministarstvo odbrane BiH da Zajedničkoj komisiji za odbranu i sigurnost BiH dostavi akcioni plan za 2015. godinu u kome bi se definirale aktivnosti, nosioci i rokovi u otklanjanju istaknutih problema koje su prezentirali ministrica odbrane Marina Pendeš i načelnik Zajedničkog štaba Oružanih snaga BiH generalpukovnik Anto Jeleč. To se posebno odnosi na:**
 - 1.1. proces nabavke i obnavljanja materijalno-tehničkih sredstava koja su preduslov za normalno funkcioniranje sektora odbrane, što se posebno odnosi na vozila, helikoptere i rezervne djelove koji su u funkciji nesmetanog izvršenja misije Oružanih snaga u cjelini,*
 - 1.2. proces (tok, dinamika i rezultati) rješavanja viškova municije i MES-a putem programa „Explode“,*
 - 1.3. proces rješavanja viškova sekundarnih sirovina koje se dobivaju procesom delaboracije MiMES-a, a što bi moglo biti problem u nastavku realizacije programa „Explode“,*
 - 1.4. proces izrade dokumenta „Pregled odbrane“ u kome se očekuje objektivian pristup analizi trenutnog stanja i izradi projekcije i vizije OSBiH u kratkoročnom i dugoročnom periodu,*
 - 1.5. informaciju o statusu nepokretne vojne imovine koja je spremna za predaju entitetskim vladama, a sve s siljem smanjenja troškova čuvanja i održavanja lokacija na kojima se pripadnici OSBiH na taj način udaljavaju od izvršenja redovnih zadataka,*
 - 1.6. informaciju o statusu prijedloga izmjene Zakona o službi u OSBiH i Zakona o odlikovanjima,*
 - 1.7. informaciju o ispunjavanju uslova za aktiviranje MAP-a Akcionog plana za članstvo u NATO.*
- 2. Obavezuje se Ministarstvo sigurnosti BiH da dostavi sljedeće informacije o:**
 - 1.1. ključnim sigurnosnim izazovima u BiH i akcionim planovima po kojima će im se suprotstaviti,*

- 1.2. ocjeni stanja koordinacije rada policijskih agencija iz sastava Ministarstva sigurnosti BiH i mjerama za nesmetano funkcioniranje,*
 - 1.3. planu okončanja rada na dokumentu „Sigurnosna politika BiH“,*
 - 1.4. toku izrade Prijedloga zakona o policijskim službenicima,*
 - 1.5. stanju sigurnosti u Bosni i Hercegovini za 2015. godinu s elementima i pokazateljima koji će dati realnu sliku stanja i mjere za suprotstavljanje pojavama koje je ugrožavaju,*
 - 1.6. mjerama koje se preduzimaju na očuvanju bezviznog režima,*
 - 1.7. realizaciji Strategije i Akcionog plana za borbu protiv terorizma,*
 - 1.8. realizaciji Strategije i Akcionog plana za borbu protiv korupcije i organiziranog kriminala,*
 - 1.9. aktivnostima SIPA-e na popuni neophodnim stručnim kadrovima po odobrenoj sistematizaciji,*
 - 1.10. aktivnostima menadžmenta Granične policije BiH na pripremi prijedloga za doradu normativnih akata i organizacione strukture koji će njenu osnovnu misiju u zaštiti i osiguranju državne granice učiniti efikasnijom,*
 - 1.11. aktivnostima Direkcije za koordinaciju policijskih tijela BiH na realizaciji postavljenih prioriteta Direkcije, koji se odnose na stepen koordinacije u radu policijskih agencija, status pripadnika Direkcije u odnosu na Zakon o plaćama i mogućnosti izvršenja zadataka u odnosu na opremu i infrastrukturu koja je na raspolaganju i upotrebi,*
 - 1.12. toku izgradnje objekata koji treba da rad Agencije za školovanje i stručno usavršavanje kadrova BiH učine dostatnim i potpuno kapacitiranim za obuku potrebnih kadrova za policijske agencije u sastavu Ministarstva sigurnosti BiH.*
3. **Centar za uklanjanje mina – BHMAC** obavazan je povremeno (najmanje tromjesečno) informirati Zajedničku komisiju o primjeni Zakona o protivminskom djelovanju u BiH, te u saradnji s nadležnim ministarstvom pristupiti izradi Prijedloga zakona o protivminskim akcijama u BiH koji će osigurati efikasnije djelovanje svih subjekata u nastavku protivminskih akcija u BiH, rješavanje finansiranja i praćenja realizacije Strategije za deminiranje do 2020. godine.
 4. **Državna regulatorna agencija za radijacijsku i nuklearnu sigurnost** obavezna je članove Zajedničke komisije informirati o stanju, sigurnosti zbrinjavanja istrošenog goriva i sigurnosti zbrinjavanja radioaktivnog otpada na Trgovskoj gori, R Hrvatska, a sve s ciljem zaštite građana i prirodnih bogatstava i teritorije Bosne i Hercegovine u pograničnom regionu koji gravitira prema Trgovskoj gori.

Predsjedavajući Zajedničke komisije
Sifet Podžić